

**125 Jahre Evangelische Kirche Brühl
1888 - 2013**

Jubiläumsfestgottesdienst am 20. Oktober 2013

Predigt in Kurpfälzer Mundart

Unsa Kärch.

Herr, ich habe lieb die Stätte deines Hauses und den Ort, da deine Ehre wohnt.
(Psalm 26, 8)

Liewe G'mei, ihr liewe Chrischdeleit!

Unsa Kärch: Sie hod was, ehrlich. Sie hod zwar nix B'sunneres, awwer viel Eigenes. Un vun all dem will ich eich heit des un sell' verzähle. Un manchem von eich werd noch viel mehr eifalle an G'schichtle un vor allem aa an Persone.

Als'der vorhin in d'Kärch nei'gange seid, habt'er do noch owwe geguckt? Nuff zu dem Boge, der üwwer de Kärchedür' is, un habt'er do donn sell Sprüchle g'lese?

Herr, ich habe lieb die Stätte deines Hauses und den Ort, da deine Ehre wohnt.

Die Ältere unner uns hawwe des Biwwelversle in de Sunndigschul' beim Brunner's Kläre auswendisch g'lernt, - die Jüngere vielleicht bei mir in der Grundschul' oder im Kunfermandeunnerricht. Egal, es is en scheene, en gute Spruch; er basst zu unsra Kärch, vun der mer heit de 125. Gebortstag fei're. Stolz derfe mer sei uff unsa Kärch! Denn: Sie hod was, unsa Kärch!

Was hawwe'mer ned alles erlebt in un mit unsra Kärch! Wenn mer uns b'sinne: Es is ä große Liewe zu dem vertraute Kärchle, des for uns Protestante vun Briehl un Rohrhof des Gotteshaus is, *die Stätte deines Hauses*. Es is die Freid', des G'schpür, des Eigene, des Heilische, des vun dem Ort ausgeht, wu für uns die Ehr' un die Herrlichkeit vun unserm Herrgott wohne dud. Irgendwie geht's oim do kalt de Buggel nunner. A heer, so is'es doch! Do in unsra Kärch spüre un erlewe mer, was Glaawe is un was Glaawe kann. Do in unsra Kärch begegne mer z'samme unserm Herrgott, do singe un bete mer. Do höre mer sei' Wort: Es dud uns ermuntere, tröste, ermahne. Do were mer durch die Sakramente g'stärkt, do empfangen mer jedes Mol de Sege Gottes. Jo, sie hod was, unsa Kärch.

Herr, ich habe lieb die Stätte deines Hauses und den Ort, da deine Ehre wohnt.

Ich weeß, dass oim der Spruch ned immer so leicht üwwer d'Lippe geht. Weil mer mit'em Glaawe im allgemeine un de Amtskärch im b'sunnere ab un zu so sei' Zweifel un Probleme hod. Drum macht mer am Sunndig um d'Kärch oft liewer en große Boge.

So mag's aa sellem Mann gange sei, der vor u'gfähr zwee'ehalb Tausend Johr vor'em Tempel in Jerusalem g'stanne is. Soll, kann ich do nei gehe? Es plogt'en, dass viel Leit' ihn fertisch mache welle. Die Ehr' hod mer ihm g'nomme. Er is in Not un er hod d'Ängschd. Korz: Er is b'schisse dro. Drum dud'er sisch mit Recht frooge: Soll, kann ich do nei gehe in den heilische Tempel? Kann de Herrgott mir helfe?

Alla gut, er macht's, er geht nei ins Haus Gottes. Un er spürt mit ä mol des Eigene, des vun dem Ort ausgehe dud. Die Ehrfurcht vor Gott macht'en irgendwie stark un gibt'em Mut. Er kann jetzterd all des sage, was'em uff'em Herz liege dud. Er kann's sage, – z'ersch aa ohne Wort'. Er steht jo vor seinem Herrn un Gott. Mit dem schwätzt'er donn, dud bete, klage, jommere, dud bitte un bettle, lobe un danke. Un er weeb: Du, Gott, verstehst mei Gedanke! Er is erfüllt von de göttliche Ehr' un Herrlichkeit, Huld' un Güte. Er is wieder wer: En ganze Mensch, ä großes Kind vun sei'm Babbe im Himmel. Die Hoffnung is wieder do in sei'm Lewe. All des un noch mender spürt'er do im Tempel. Ä groß' G'schenk is des. Desderwege kann'er locker sage und fröhlich bekenne:

Herr, ich habe lieb die Stätte deines Hauses und den Ort, da deine Ehre wohnt.

Un donn geht er wieder raus aus'em Haus Gottes un nei in sei altes Lewe, des er awwer mit annere Auge sehe kann. Sein Glaawe un sei Selbstvertraue sin wieder stark. Gott sei Dank.

So u'gfähr war des mit dem Psalmbeter vor zwee'ehalbtausend Johr.

Un wie is'es bei uns heitzutag, mei lieve G'mei? Mir welle uns mol erinnere, wie und wonn mir in all de letschde Johr' in unsa Brieler Kärchle nei'gange sin. Es hod g'wieß immer g'nug Gelegenheite oder Verpflichtunge gewwe, wu mer donn in de Rückschau noch froh un dankbar sin', dass mer do in unsra Kärch hawwe sei könne.

Drum will ich jetzterd mol bei eich nochfroge, - awwer klor.

Wer vun eich is do in unserm vertraute Kärchle gedaaft wore?

Händ' hoch!

Vun wem sind die Kinner oder die Enkel gedaaft wore?

Wer is als Pate oder Gätle debeig'stanne?

Wer is do kunfermiert wore? Oder die Kinner un Enkel?

Wer hod die Jubelkunfermation g'feiert?

Wer hod do g'heiert? Oder sei Goldene Hochzisch feire kenne?

Jo, was hawwe mer in un mit uns'ra Kärch ned alles erlebt! Sie hod ewe was Eigenes un sehr Persönliches.

Sie is jo des älteste Gotteshaus vun Briel un Rohrhof. Ehrlich! Im sog. Dreikaiserjohr anno 1888 is'se gebaut wore. A b'scheidenes Gebetshaus sod's were. Doch die Brieler Kärcheg'meinderät' hawwe noch hordisch die Bauplän' ä bissele verännert – un schwupps war des Gebetshaus ä kloine Kärch mit em Türmlle druff, in dem zwee Glocke gebimmelt hawwe.

Anno 1957 is unner Pfarrer Paul Askani unsa Kärch noch ä mol ä bissele größer wore. De Altar un d'Kanzel ware jetzerd nimmer aus Holz, sondern aus Sandstoi'. 1965 is ä richtische Pfeife'orgel dezu kumme. Un im Jahr druff sin die Läutbuwe arbeitslos g'worre, weil die Glocke ihr'n Schwung elektrisch g'kriegt hawwe. Sin' vielleicht ehemalige Läutbuwe unner uns?)

Zum Jubiläumsjahr 1988 is wieder renoviert worre, vor allem die feucht' Wänd' ware ä Problem. Des große Holzkreuz is durch en Wandbehang – ä Segel in Kreuzform – ersetzt worre. Es gibt immer noch einische, die dodemit ned glücklich sin.

Vor vier Jahr – 2009 – is ä bissele mehr renoviert worre. Neue vielem annere hod's wieder ä nei Kanzel gewwe. Als de alte Brieler Pfarrer muss ich sage: Die jüngere Leit' hawwe ihr Sach' sehr gut g'macht bei de Renovierung. Dass mer an de Wänd' noch en weiße Kittel kriegt, wolle mer heit mol vergesse.

Jo, sie hod was, unsa Kärch. 125 Jahr is'se alt oder aa jung. Fünf Generationen hawwe seither in ihr Gottesdienst' g'feiert. Zehn Pfarrer un ää Pfarrerin sowie sechs Vikare un drei Pfarrvikarinnen ware in all dene Johre do in unsra Kärch tätig. Un ich kenn' zwee ganz treue G'meindeglieder, die alle elf Pfarrersleit' erlebt hawwe: Ilse Winkler un Edith Jochum. Beide sin noch vum erste Brieler Pfarrer Adolf Gerhard getauft worre.

Es is jo so:

Die Pfarrer kumme un gehe; awwer die G'mei bleibt.

Die Kanzle sehe mol so oder so aus; awwer des Wort Gottes, des vun do verkündischt wird, bleibt ewiglich.

Des Wort Gottes werd vun de Kanzel mol so oder so ausg'legt; awwer es hod immer d'Mensche in ihr'm Lewe o'g'sproche, - selle, die wu glaawe kenne un aa selle, die wu ihre Zweifel hawwe.

Un die Lieder in unsra Kärch hawwe mol so un so g'heiße; awwer immer war's en kräftische G'sang – vun de G'mei un vum Kärchechor (seit 1904!)

Ä Kärch, liewe G'mei, is mehr als vier Wänd' mit em Dach drüwwer. Ä Kärch wird dann zu em Gotteshaus,

- wenn se sich immer wieder mit Lewe füllt;

- wenn do die Ehre Gottes wohnt;

- wenn do drin Gott dem Herrn die Ehr' gewwe werd;

- wenn do de Glaawe an de dreieinige Gott g'sucht, bekannt un g'lebt werd durch die Tat der Liewe.

Un all des passiert in unsra Kärch. Jo, sie hod was.

Un des Eigene, was'se hod, will ich mol so umschreibe.

Unsa Kärch is kloie un heimelich. In de Gottesdienst' sitzt mer relativ noh beie'nanner. Als Pfarrer, der vorne steht, kann mer oft erahne un spüre, was die einzelne Gottesdienstb'sucher bewegt, b'schäftigt oder freudisch un hoffnungsvoll macht. S'Lewe in seiner ganze Vielfalt zeigt sich donn. Glaawe werd g'lebt, - ob groß oder kloie, ob fesched oder mit Zweifel. Un wenn donn in unsra Kärch die Lieder o'stimmt were un de gonze Kärcheraum erfüllt is vum G'sang un scheene Orgelspiel, - ha, ihr Leit, ihr liewe G'schwister im Glaawe, donn is'es mit de Händ' zu greife un

mit alle Sinne zu erlewe, dass do die Ehre Gottes wohnt.
Jo, sie hod was Eigenes – unsa Kärch!

Wenn'mer mit'em Segen Gottes aus dä Kärch wieder raus gehe in de Alltag, in unser Lewe, so kenne mer wie seller Psalmeter vun domols locker sage un fröhlich bekenne:

Herr, ich habe lieb die Stätte deines Hauses und den Ort, da deine Ehre wohnt.

Drauß stehe mer donn wieder uff de Kärche'stroß', die ihr'n Nome desderwege hod, weil an ihr zwee Kärche gebaut wore sind: Am O'fang un am End' von de Stroß', uff de linke Seit' die oine un uff de reschde Seit' die anner. Üwver Jahrzehnte hinweg is des vorne un hinne, links un rechts, dort d'katholisch' Schutzengelkärch' un do d'evangelisch Kärch' als was Trennendes erlebt wore.

Doch mir hawwe's in de letzsche Jahr' selwer erfahre un in de Ökumene vor Ort mitg'staltet, so dass jetzerd d'Kärchestroß' uns mite'nanner verbinne dud. Als Chrischdeleit' in zwee Konfessione b'suche mir uns, mir fei're do un dort uns're Gottesdienst'. Gar manches hawwe mer vune'nanner g'lernt. Doch bei vielem sage mer noch: So is'es bei uns – un so soll's aa bleiwe. Doch unsa Glaawe is reicher un vielfältiger g'worre.

Jo, mir kenne getrost, frohgemut un dankbar bekenne:

Herr, ich habe lieb die Stätte deines Hauses und den Ort, da deine Ehre wohnt.

Unsa Kärch: Sie hod was.

Ame(n).

Pfarrer i.R. Oskar Ackermann
Brühl/Baden